



15 Ogos 2017
15 August 2017
P.U. (A) 237

WARTA KERAJAAN PERSEKUTUAN

FEDERAL GOVERNMENT GAZETTE

PERINTAH CUKAI PENDAPATAN (PENGECCUALIAN) (NO. 6) 2017

INCOME TAX (EXEMPTION) (NO. 6) ORDER 2017

DISIARKAN OLEH/
PUBLISHED BY
JABATAN PEGUAM NEGARA/
ATTORNEY GENERAL'S CHAMBERS

AKTA CUKAI PENDAPATAN 1967

PERINTAH CUKAI PENDAPATAN (PENGECUALIAN) (NO. 6) 2017

PADA menjalankan kuasa yang diberikan oleh perenggan 127(3)(b) Akta Cukai Pendapatan 1967 [*Akta 53*], Menteri membuat perintah yang berikut:

Nama dan permulaan kuat kuasa

1. (1) Perintah ini bolehlah dinamakan **Perintah Cukai Pendapatan (Pengecualian) (No. 6) 2017**.

(2) Perintah ini disifatkan berkuat kuasa mulai tahun taksiran 2016 hingga tahun taksiran 2025.

Tafsiran

2. Dalam Perintah ini—

“aktiviti yang layak” ertinya aktiviti yang dijalankan bagi memastikan penyelarasan, pelaksanaan dan pengendalian Taman Eko Sisa yang berkesan dan cekap, termasuk—

(a) menggalakkan dan mengiklankan Taman Eko Sisa;

(b) menguruskan kemudahan dan infrastruktur dalam Taman Eko Sisa;

(c) memastikan pembekalan jenis dan jumlah sisa yang diterima dalam Taman Eko Sisa adalah mengikut kapasiti kemudahan dan infrastuktur dalam Taman Eko Sisa; dan

(d) menguruskan pengasingan dan pemisahan sisa bagi stok suapan pengendali yang disebut dalam Perintah Cukai Pendapatan (Pengecualian) (No. 4) 2017 [*P.U. (A) 235/2017*] dan Perintah Cukai Pendapatan (Pengecualian) (No. 5) 2017 [*P.U. (A) 236/2017*];

“pengurus” ertinya suatu syarikat yang diperbadankan di bawah Akta Syarikat 2016 [*Akta 777*] dan bermastautin di Malaysia yang menjalankan aktiviti yang layak;

“Taman Eko Sisa” ertinya suatu tempat bagi aktiviti kitar semula, pemulihan dan rawatan sisa dijalankan yang mempunyai ciri-ciri minimum yang berikut:

- (a) infrastruktur asas seperti jalan, sistem pengaliran, utiliti dan pembentungan;
- (b) bangunan dan kemudahan bagi penerimaan dan pengasingan sisa;
- (c) kemudahan rawatan air sisa;
- (d) bangunan bagi kemudahan kitar semula, pemulihan atau rawatan sisa; dan
- (e) bangunan bagi pusat pendidikan dan kesedaran.

Pengecualian

3. (1) Tertakluk kepada subperenggan (3), Menteri mengecualikan pengurus dalam tempoh asas bagi suatu tahun taksiran daripada pembayaran cukai pendapatan berkenaan dengan tujuh puluh peratus daripada pendapatan berkanun yang diperoleh daripada aktiviti yang layak.

(2) Permohonan bagi pengecualian di bawah subperenggan (1) hendaklah dibuat kepada Menteri melalui Lembaga Pembangunan Pelaburan Malaysia pada atau selepas 1 Januari 2016 tetapi tidak lewat daripada 31 Disember 2020.

(3) Pengecualian yang diberikan di bawah subperenggan (1) adalah tertakluk kepada syarat yang berikut:

- (a) Taman Eko Sisa telah diluluskan oleh pihak berkuasa yang dinyatakan dalam Jadual, Kerajaan Negeri dan pihak berkuasa tempatan yang berkenaan sebelum aktiviti yang layak dilaksanakan;
- (b) pengurus hendaklah menyenggara rekod mengenai semua sisa dan produk yang masuk ke dalam dan keluar dari Taman Eko Sisa dan menghantar laporan berkala mengenai rekod itu kepada pemaaju;
- (c) keseluruhan jumlah sisa yang diterima setiap bulan perlu diproses dan maksimum tiga puluh peratus daripada jumlah sisa yang diproses itu dibenarkan untuk dilupuskan dengan cara kambus tanah;
- (d) hanya sisa yang diperolehi dalam Malaysia, termasuk zon bebas atau gudang pengilangan berlesen, yang dikitar semula, dipulihkan atau dirawat dalam Taman Eko Sisa dan pengurus tidak dibenarkan untuk mengimport sisa ke dalam Malaysia; dan
- (e) pengurus mematuhi semua undang-undang bertulis, garis panduan, syarat dan arahan berhubung dengan pengecualian yang diberikan di bawah Perintah ini dan berhubung dengan pengurusan sisa.

(4) Tiada apa-apa pun dalam subperenggan (1) boleh melepaskan atau disifatkan telah melepaskan pengurus daripada mematuhi apa-apa kehendak untuk mengemukakan apa-apa penyata atau penyata akaun, atau memberikan apa-apa maklumat lain, di bawah Akta.

(5) Dalam perenggan ini—

“Lembaga Pembangunan Pelaburan Malaysia” ertinya Lembaga Pembangunan Pelaburan Malaysia yang ditubuhkan di bawah Akta Lembaga Pembangunan Pelaburan Malaysia (Pemerbadanan) 1965 [*Akta 397*];

“pemaju” ertinya pemaju yang disebut dalam Perintah Cukai Pendapatan (Pengecualian) (No. 7) 2017 [*P.U. (A) 238/2017*].

Pendapatan berkanun

4. (1) Tertakluk kepada subperenggan (2), pendapatan berkanun yang disebut dalam subperenggan 3(1) dalam tempoh asas bagi setiap tahun taksiran yang dikecualikan hendaklah ditentukan selepas memotong elaun yang boleh diberikan di bawah Jadual 3 kepada Akta walaupun tiada tuntutan bagi elaun itu telah dibuat.

(2) Jika suatu aset digunakan bagi maksud aktiviti yang layak juga digunakan bagi maksud suatu aktiviti selain aktiviti yang layak, maka amaun elaun yang boleh diberikan di bawah Jadual 3 kepada Akta hendaklah dipotong sebagaimana munasabah mengambil kira setakat yang aset itu digunakan bagi maksud aktiviti yang layak.

(3) Jika, oleh sebab ketiadaan atau ketidakcukupan pendapatan berkanun, pengecualian tidak boleh diberikan atau tidak boleh diberikan sepenuhnya sebagaimana yang pengurus itu berhak di bawah subperenggan 3(1) bagi tahun taksiran itu, maka sekian banyak daripada pendapatan berkanun yang berkenaan dengannya pengecualian tidak boleh diberikan bagi tahun taksiran itu, hendaklah diberikan pengecualian bagi tahun taksiran pertama yang berikutnya bagi tempoh asas yang pengurus itu mempunyai pendapatan berkanun daripada aktiviti yang layak, dan bagi tahun atau tahun-tahun taksiran yang berikutnya sehinggalah pengecualian diberikan berkenaan dengan keseluruhan pendapatan berkanun sebagaimana yang pengurus itu berhak di bawah subperenggan 3(1).